



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:

30 грошей місячно,
80 „ кварталньо,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сторони 60 зл., $\frac{1}{4}$ сторони 35 зл., $\frac{1}{8}$ стор. 20 зл., $\frac{1}{16}$ стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знижка.

Кonto чекове Нр. 404.155.

Апостольскый Администратор на празднику в Крыниці.

В день святых апостолов Петра и Павла припадат великий отпуст в Крыниці. В тот день приїжджат много народа с цілою Лемковщины, а также видит ся нерідкы группы людей с сусідних сел, положеных в Чехословакии. Отпусты в Крыниці мают отдавна свою славу и кромі богомольцов притягают они массу крамарей с ріжними товарами. Не бракуе ту также и калік, котры сходят ся с далеких стран, знаючи жертволюбие нашего народа.

В том році праздник тот выпал особенно величаво, бо народ витал на нем своего Владыку, Експ. Апостольского Администратора.

Експ. Ап. Администратор приїхал автом в

неділю вечером. В часі богослуженя в день праздника выголосил Он проповідь и уділил архиерейского благословеня, а во вторник отслужил тиху Службу Божу за упокой души бл. п. о. Жегестовского, фундатора церкви и приходского дома в Крыниці и принял численны делегации селян, интеллигенции и священников.

По огляненю церковного и парохияльного маютку и познакомленю ся с місцевыми обставинами, о годині 3-ой по полудни выїхал Владыка до Рыманова, вступуючи по пути до о. декана Емилияна Венгриновича в Мохначці Нижной.

Опасность войны на Далеком Выході.

Недавно змягчено конфликт меже Японіем и Совітами, а уж газеты доносят о новых инцидентах в полночном Китаю, меже Японіем и Кытаем. Дошло там уж до поважных боев, по обох сторонах лів ся кров и обі стороны стягают под Пекин новы войска, што каже досмотряти ся опасности войны на Далеком Выході. Кытай оголосил уж у себе загальну мобилизацию. По обох сторонах ест много убитых и раненых.

Бои под Мадрытом.

Под Мадрытом идут завзяты бои. Повстанцы принустили сильны атаки в цілі отобрания утраченых позиций. Коло Вилля Нуова дель Пардільо червены войска в сильной контратаці отшмарили назад повстанчы войска, задаючи им поважны втраты.

Дня 12. т. м. повстанчы корабель „Канарияс“ хотіл заняты корабель „Кампильо“, належачий до правительственных войск и везучий с Картагены до Валенции нафту. Кораблеви „Кампильо“ посніпили с помочом два иншы кораблі, в виду чого корабель „Канарияс“ по отдаю пару арматных стрілов мусіл утечи. „Кампильо“ счастливо добил до берегов Валенции. Втрат в том морском бою не было.

В ділі поширеня Бурсы в Горлицах.

Дня 9. и 10. т. м. делегация Лемко - Союза и Руской Бурсы в Горлицах в лицах Д-ра Ярослава Сьокалы, адвоката в Горлицах и Михаила Кобасы, господ. в Мацині Великой, интервенировала в Министерстві справ войсковых и в Мин. Народн. Просвіщеня в справі поширеня Руской Бурсы в Горлицах и горлицкой гимназии.

Так в одной як и другой справі міродательны чинники отнесли ся доброжелательно и ест полна надежда, што в будучности число кляс при горлицкой гимназии буде выстарчаюче, а во всяком случаю приняте до гимназии

тых воспитанников бурсы, котры здали экзамен, ест певне.

Независимо от того в отвіт на внесеный Лемко - Союзом до Мин. Войск. Діл мемориял пришло под адресом Лемко - Союза письмо, в котром адютантура Министра Воен. Діл увірят правлене Лемко - Союза, што Министр ген. Каспржицкий доложит старань в напрямі поширеня гимназии в Горлицах, штобы в будучности діти Лемковцині (не мусіли ити до украинских гимназий) помістили ся в горлицкой гимназии.

—ооо—

Жена президента Рузвелта оскаржена

о неплачене податков.

До комисии слідчой для справ податковых в Вашингтоні подал Фиш, посол с Нью-Йорку скаргу на жену президента Рузвелта, же она подписала контракт с американским радио и на основі того контракту за выголошаны через ню отчити мали вплынути поважны сумы до кас розмаитых добродичных товаров. От тых сум ведля Фиша жена Рузвелта мала платити податок.

Скарга его оказала ся безосновна, бо пані Рузвелт не користала преця сама с тых сум и сумы тоты не переходили через ей руки, але Фишови росходило ся о шмарене тіни на жену Рузвелта, котра тішит ся в Америкі за-

гальным миром и сымпатіом. В своей демагогичной скарзі Фиш меже иншим так сказал: Если бы Рокефелер не платил податков от грошей, перезначеных на добры ціли, то его податки поменьшали бы ся о 60% и держава мала бы величезну втрату.

Пані Рузвелт заявила газетарам, же все была певна, же поступат ведля права, але тепер зашмаряют ей штоси инше. Если окаже ся, же мусит она платити податки от сум, котры не переходят через ей руки, то буде частійше выголошати через радио отчити, штобы старцы и калікы через того не утерпіли.

—ооо—

В Совітах бракуе запасовых частей до машин.

Ведля заявленя комисара рольництва, справа приготовленя в Совітах рольничих машин на час жнив и заосмотреня их в потребны запасовы части, представлят ся планно. Стан продукции частей запасовых ест выконаний в розмірах от 40—62%, а гдеяких частей вы-продуковано лем 16,6%, притом части тоты, як ся оказуе при ремонті сут зроблены зле.

Так званы „комбайны“ мают вьсього лем 14% потребных запасовых частей. Бракуе запасовых частей аж и для таких машин, як конны граблі, косярки и плугы, до котрых ніт лемешей.

Линдберг хоче побідити смерть.

Знаний американський летчик, побідитель Атлантики, полк. Линдберг єст также знаним ученым.

Уж перед пару роками удало ся ему разом с другим ученым Александром Каррельом сконструувати штучне сердце. Был то перший удачный експеримент того рода. При помочи специального апарату учены сут в стані удержати при житю всі живы органы, выняты с живого тіла без органиченя часу.

Штучне сердце дає им без перервы кров и други субстанции, без котрых жите єст невозможне. Поодынокы органы жили ище долго, аж и по смерти организма, с котрого были вирізаны.

Тепер полк. Линдберг поселил ся на не-

величком острові Ст. Жильдас, положеном на океані Атлантиком, недалеко Бретонии. Там находит ся ляборатория, в котрой он и д-р. Карреля робят свои досліды.

Одному кореспондентови удало ся навязати розговор с Линдбергом и Каррельом. Учены не хотіли дати близши поясненя, сказали однако, же если их труд даст добры результаты, то буде розвязана справа житя и смерти.

Уж по вынаході штучного сердца полк. Линдберг и д-р. Каррель заявили, же наміренем их єст продолжити жите, як долго ся захоче. Наміряют они не лем удержати при житю органы, вирізаны с живого организма, але также оживити органы с мертвого организма.

—ооо—

Чом розстріляно Тухачевского.

Найвекше здивоване во всіх краях Европы выкликал розстріл маршала Тухачевского и генералов. Засуд тот подкопал престиж совітской Росии у союзных держав и Франция, як подають газеты, мала зажадати от Совітов выясненя в той справі.

Ведля донесень „Последних Новостей” французске правительство мало достати от Совітов документи, относячи ся до процесса Тухачевского и генералов.

С документов тых видно, же меже Тухачевским и Німеччином не было ниякого porozумленя. Всі розстріляны, кромі Путны, хотіли однак обалити диктатуру Сталина, усунути комуністичный порядок и на его місце запро-

вадити федеративну державу на национальных основах и привернути ей имя Росия.

Тухачевский и его приятелі не наміряли ослабляти силы Росии, а наоборот стремили до увеличеня военных сил. Хотіли они также привернути приватну власность.

С того видно, же не зрада державы и не шпйонство в користь Німеччины, як то старають ся справу представити официальные совітскы кругы, стали ся причином смерти маршала Тухачевского. Тухачевский и его сторонники-генералы мусіли умерти, бо они были опасны для Сталина и комуністичного порядка.

—ооо—

ОБРАЗ ЗНИЩЕНЯ В ИСПАНИИ.

Дня 18. липня минул рок от часу выбуху домашной войны в Испании и тепер трудно предвидіти, коли ся она скончит, бо если бы там били ся лем сами испанцы, то она закончила бы ся уж давно.

Але, як знаме, ряды обох армий, так повстанчой, як и червеной сут подкріплены чужима державами, котры становят тепер головну силу зражающих ся сил.

Знаме, же повстанцам помагают явно Німеччина и Италия, а червены войска достают подпору с Совітов и других держав, звязанных с Совітами союзом. И на той почві видиме яєно, же борба иде не лем о „біле”, або „червене” лице Испании, але же там розгrywат ся завзята борба меже двома світопоглядами, поборюючими ся взаимно, стоячими на двух противоположенных бігунах, а то меже комунізмом и меже национальным рухом.

Прото тиж положене в Испании єст грозне и опасне для цілой Европы. Одєн момент може спричинити выбух войны в Европі, тым больше, же утворена через политыков т. зв. система неинтервенции (невтручаня ся до справ испанских) розлітує ся через непорозумленя на почві контролі побережа меже Німеччином и Италиом с одной и Англиом и Франциом с другой стороны.

Испания по року войны замінила ся в руину. Ведля обчислень мадритских газет самы материяльны втраты выносят суму 46 миллиардов песетов. Можна собі представити того знищене, як припомниме собі, же рочный бюджет выносит в Испании 4—5 миллиардов злотых, отже если бы Испания всі гроши с податков и инших жерел обертала лем на отбудову Испа-

нии, то мусіла бы через перешло 10 літ отдавати цілый бюджет на тоту ціль. Розуміє ся, же того єст невозможне, в виду чого отбудова Испании може наступити лем при помочи чужого капитала, што мусит Испанию допровадити до зависимости господарчой и политычнрой.

Соткы тысяч трупов дополняют страшный образ знищеня и результат братоубийчой войны, котра приберат чимраз завзятійший вид так на полночном як и мадритском фронті, где в часі последних боев унало 16 тысяч вояков убитыма и было парунадцет тысяч раненых.

Пісок вмісто лєну.

Правдивым несчаєтем теперешных часов, єст того, же намножила ся маса ошустов, котры ошуство трактуют, яко фах и жерело доходов.

Сут они притом так помысловы, же дають ся им набрати часто и неглуны люде.

Такым ошустом в Варшаві єст также Юзеф Козицкі, котрый был уж 30 раз караный. Тот то ошуст надыбал в Варшаві богатого купца со Львова и предложил ему купно 45 мішков красного чесаного лєну за небывало низку ціну 1.300 зл.

Купец, Осияш Кнани вилатил ошустови гроши, а тот надал му на колей вмісто лєну 45 мішков піску. Козицкого арестовано и суд засудил его остро, бо беручи под увагу того, же Козицкі был уж тилько раз караный, вымірил му найвысшу кару — 5 літ криминалу.

ЛЕМКОВИНА.

Лемковино люба,
Лемковино мила,
Молю ся за Тебе,
Я Лемко - дітина.

Молю ся за Тебе,
Молити ся буду,
Бо мя так навчили
Діды и прадіды.

Дмитро Шквир.

Дальша „чистка” в Совітах.

Аресты и розстрілы в Совітах не устають. На цілом пространстві великой Росии идут дальши аресты, котры обнимають чим раз ширши кругы.

Найвысший суд республики грузинской по отбытой при закрытых дверях росправы засудил на кару смерти князя Мдивани, Торошелидзе, Окудзава, Курулова, Чихладзо, Елияву и Карцывадзе.

Совітскы газеты подають, же всі засудженны были активными членами противсовітской организации в Грузии и вели акцию шпйонску, шкодливу и дыверсійну, а также приготоеляли террорыстичны акции против руководителям партии и правительства в Грузии.

Засудженны, по словам совітских газет, признали ся до вины.

Окрал костел в Сяноці злодія АРЕСТОВАНО.

Недавно окрал ктоси костел в Сяноці. Забрал он литургичну посуду вартости 2.000 зл. Тепер зловлено злодія. Єст ним Казимір Венгельский, електромеханик со Львова, котрый робил в фабриці вагонов в Сяноці.

Венгельский початково выперал ся всего, але по пару днях признал ся до вины и описал точно перебіг крадежи.

Вечером вліз до костела и скрыл ся на стрыху. В ночи окрал костел, а не могучи вытрыхом отворити дверей, выбил витражову шибу в окні и выдostal ся с костела.

Річи загопал в землі недалеко желізнодорожного моста.

Кромі того доказано Венгельскому ряд инших краж, меже другим, кражу полевой льорнеты. В часі ревизии найдено у него 2 вергеймеровскы ключи до огнеотпорных кас. Ключи тоты надають ся до головной касы фабрики вагонов в Сяноці, котру Венгельский намірял окрасти.

Венгельского, котрый выїхал с Сянока, зловлено во Львобі и осаджено в вязниці в Сяноці.

ВУЛЬКАН ЗНИЩИЛ МІСТО.

На Новой Гвиней (острові на океані Спокойном) наступил выбух вулькана, котрый знищил місто Рабавль. До знищеня міста причинили ся также балваны взбуреного моря. Гром выбуху вулькана был так сильный, же чути его было в місцевости Кавиєно, отдаленой о 150 миль от місца катастрофы.

В потоках шаліючой вульканичнрой лавы нашло смерть понад 500 люда.

ПОМІЩАЙТЕ
ОГОЛОШЕНЯ
В ГАЗЕТІ „ЛЕМКО”.

О безработю на селі.

Давно не бесідовано у нас совсем о безработю. Не протом однак, шtbody безработя не было, лем тому, бо не звертано на безработных увагы. Аж в часі поглубяючого ся крызысу выступило ярко безработе по містах и тым безработем заинтересовали ся міродательны чинники цілого світа.

Але кромі безработя містового ест ище безработе на селі, о котром не пише ся совсем, або пише ся барз мало, хоц оно обнимат бодай же таке саме количество людей, як и безработе по містах.

Перед пару роками газеты заинтересовали ся безработем на селі, але в послідных часах, коли ціны рольных продуктов кус подскочили, коли дала ся спостеречи поправа господарча в цілом краю, газеты замолкли, веце той справы не рушають и здавало бы ся, же безработе на селі счезло.

Тымчасом так не ест. Безработных на селі ест много, лем характер безработя на селі ест кус отмінный от безработя в місті и протом не шмаряют ся оно так сильно в очи и не ест так опасне, як безработе в місті.

Безработны на селі мають все якасы занятя. В малых господарствах робит часто троє людей там, где дал бы собі раду оден человек, тому двоє с того господарства можна уважати за безработных.

Але безработны на селі мають звичайно свой кут при родині и яку таку страву. Страва тотая, то звичайно комперы и капуста, рідко хлїб. Такой безработный ест все на половину голодный и нужденный.

Безработны в місті находят ся в инных условиях. Там, если нїт работы, грозит дораз голодова смерть. Зрозумїла річ, же такой стан крыве в собі опасность, котра може ся замінити в небезпечны конфликты.

Сут розмаиты возможности розвязкы сельского безработя. Вытворити и оживити краєвыи промысл — то найважнїша возможность. Але покаль край покыве ся густом сітю битых и желїзных дорог, покаль выбудує ся фабрыкы и потворит ся фабрычны осередкы — то дуже воды ище услыне.

При том не можна забывати, же в місті сут также безработны, котрых в першой мірі треба затруднити при фабрыках. Зрештом розбудова промысла зависит у нас от материяльных средств населеня сельского, от силы купна у селян и от устраниеня по селах безработя.

Як с того видно безработе не даст ся усунути при помочи одного средства. Ту мусит ся примінити цілу громаду средств и цілый ряд способов, стремячих до устраниеня безработя. Много способов, причиняючих ся до устраниеня безработя на селі, можна найти на селі.

Если сельскы безработны не могут достати місца в фабрыках, если эмиграция — яко средство устраниюче надмір сельских рабочих рук, престала уж грати таку роль, яку грала давно, — то треба, шtbody безработны на селі нашли роботу и заробок на селі.

Даст ся тото легко перепровадити, если село стане управяти у себе поплатнїши ростины, котры вымагають однак веце заходу и работы.

В зависимости от терену и климатичных условий управа винограду и ярин, садоводство, управа дугану и олейных насїнь, пасїчництво и т. д. вымагають с одной стороны великого накладу работы, а с другой стороны дають селянину вышнї доходы.

Такым способом безработны на селі нашили бы роботу и гроши на селі. Але шtbody такы зміны в господарстві ся оплатили, треба также сорганізovati продаж выпродукованных землеплодов и ту особенну роль могут отограти кооперативы и организации рольничо-общественны.

Як переховати яйца.

Ест много приписов о перехованю яиц и забезпеченю их перед псутом на долший час. Яйца, особенно в часі спеку, псуют ся скоро, бо шкарлупа у них має маленькы отворкы, через котры достає ся до середины повітря. Яйце с розбитом шкарлупом псує ся ище скорше, бо доступ повітря ест сильнїший. Протом тыж яйца, перезначены до перехованя повинны быти неушкоджены, чисты и отвітно забезпечены перед доступом повітря.

Найпрактичнїше ест переховати яйца в ростворах, насыченых противгнильными средствами, нпр. в ростворі соли, вапна и водного шкла.

Як можна остудити воду и стравы в літі.

Где нїт ледовні и доброй пивниці, там в літі часто ест клопот с перехованем мяса, молока и других страв, котры на спєці ся псуют и достають немилый смак и выгяд.

А однак ест легкый и недорогый способ остудженя страв в літі.

До широкого 10-литрового ведра або шафля воды даєме $\frac{1}{2}$ кг. соды и $1\frac{1}{2}$ ложочки

Така реформа наших господарств разом с діяльністю в напрямі розбудовы промысла в краю и с упорядкованем аграрных отношень на селі, може ся причинити до розвязкы безработя.

Найважнїша однак річ, шtbody не забывати о безработю, котре ест найвекшом болячком нашого господарчого организма. От устраниеня безработя зависит господарча сила нашого краю и добробыт цілого населеня.

Роствор соли робит ся так: в 4-ох литрах воды роспуцаєме $\frac{1}{2}$ кг. соли и 10 ложек паленого вапна. Тото выстарчит на 60—80 яиц. Яйца укладаєме, одно коло другого, в каменном горниці, — а если ест их много, то в деревяной скринці, або в добре вымытой бочці и заливаєме роствором по сам верх так, шtbody вода оплынула горїшну верству.

Роствор водного шкла повстає через змішанє $\frac{1}{2}$ л. водного шкла (купує ся в аптеці) с 5-ома литрами воды.

При ростворі вапennem даєме на 10 л. воды $\frac{1}{2}$ кг. вапна, котре належит добре вымішати. По 2—3 днях зливаєме осторожно сам пlyn, без осаду и додаєме до него 1 грам кухонной соли.

сальмяку. До той воды вставяєме перезначены до остудженя стравы и напитки, а также посуду смаслом, молоком, мясом и т. д. и накрываєме змоченом в воді шматком.

По парунадцетох минутах стравы будут холодны, приятны до їдла.

Воду с содом и сальмяком можна ужити до праня, або чуханя дылин.

Як лічити мозолі у статку.

Як роговина подошвы ноги ест дост мягка и статок ходит по твердой дорозі, то часто случат ся, же статка куліє. Оно огнєло ратицу и на ней повстал кырвавый мозоль. Такы мозолі лічїме так, же отвераєме мозоль и чистїме его лизольовом водом (лизоль можна купити в каждой аптеці). Найлучше роспустити лизоль с водом и замочити в нем ногу так, шtbody вода оплынула ратицу.

Часто у волов повстають мозолі от ярма, або у коней от сїдла. Мозолі тоты треба отличити от огнєту, при котром выстарчит выдусити огнєт и потерти боляче місце боровом мастю, а на ярмо, або хомонт пришити

мягкый кожушок. Правдивый мозоль познаєме по отоку, котрый ест остро ограниченный и горячий. Мозоль лічїме так, же в першой мірі усуваєме причину, а пак даєме оклады так, же полотняну шмату пару раз согнєме, замочїме до воды, приложїме на мозоль и прикрїєме сукном. Тото повтараєме што три години.

Найопаснїши мозолі могут быти на когутку карку, бо ту може быти захвачена и кость. Также небезпечне ест, если при мозолях приїде запалєне.

Там, где с мозоля тече кров, пораднїше ест уживати до окладов чисту церату, або гуму с души фотбалю, або ровера, бо полотняный оклад скоро зайде кырвю и рана от того робит ся векша.

О розвязанє справы суровых товаров.

В газеті „Лье Темне“ появил ся артыкул Ст. Осуекы-ого п. н. „Суровы товары и перезначене Европы“, в котром автор потверджат, же жерела суровых товаров нашли ся в руках пару держав.

Ряд промысловых держав, позбавленых суровых товаров, мал дотепер два способы залосмотряня ся в тоты товары, а именно: або через одержанє заграничных кредитов, або через выміну за свои товары.

От р. 1929. свобода выміны ест загамоєвана, бо коли тепер торговля суровыми товарами выносит 93,5% стану с р. 1929. то торговля товарами промысловыми упала до 68,5%. Тото ест міром трудностей держав о розвиненой промышленности.

Ведля автора найбарже отчувають недоста-

ток суровых товаров: Німєччина, Италия, Чехословакия, Бельгия, Польша, Швайцария и Австрия. Спосеред тых держав найсильнїше кричат Німєччина и Италия, віроятно протом, бо сут дост сильны, шtbody примусити до послуху. Шtbody зарадити своим недостаткам, тоты два могучества жадають кольоний.

Фактом ест, же заосмотрене промысловых держав в суровы товары, то животна справа цілой Европы. Який же ест выход с того положеня? Державы, котры мають много суровых товаров, не хотят подїлити ся кольониями, богатыма в тоты товары.

Ведля автора того артыкула сут отже два способы выхода, а именно: або война, або загварантованє торговельной свободы в таких розмірах, шtbody тото позволило державам, не маючим суровых товаров, користати с богатств, с котрых тепер користають обильно лем гдеякы державы.

Що чути в світі.

Достал нагороду за мухы. В Японії пере- водит ся тепер остру борбу с мухами, яко с розносителями всяких заразков хворот. В То- кио уряджено навет „тыждень забиваня мух“ и визначено дост високу нагороду для тых, котры в том тыждні забют найвце мух.

Першу нагороду достал студент Ситаа, котрый през тыждень забил 220.101 мух. Загалом за тот тыждень забито в самом Токио о- коло 98 милионов мух.

Ювелей коровы. В Копенгазі (в Данії) от- был ся незвычайный ювелей 20-літя коровы „Максимы“. Корова тота дала через 18 літ 92 тыс. 720 литров молока. Єст то рекордове чи- сло аж и для Данії, где стоить барз високо рольна культура.

„Максиму“, прикрашену квітем, опрова- джено по цілом місті. Выголошено ряд бесід и уряджено в ей честь гостину, котрой коро- ва могла ся лем приглядати.

Рой пчол напал на прогулку. Недалеко Ковна на идучу дорогою прогулку напал рой пчол, котрый пожалил так сильно людей, же 90-еро люда отвезено до шпитала.

Втекли с вязниці С амерыканской вяз- ниці в Оклогамі утекли два преступники, засуджены на безгерминну вязницю. Всіли они до авта дыректора вязниці и іхали перед себе с шаленом быстротом так долго, покаль не бракло им бензыны. Пак высіли и скрыли ся в лісі. Выслано за нима погоню.

Спал цілий тыждень. Оден селянин с Венгрії заснул вечером и збудил ся аж... по тыждневи. Был здивований, же родина єст занепокоєна, бо здавало ся ему, же спал лем одну ноч.

В Нью-Йорку єст ище 19 тысяч коней. С того, што читат ся в газетах, здавало бы ся, же в Америкі ніт уж коней и же там всі здыт самоходами. Тымчасом ведля статыстыкы в самом Нью-Йорку и его окрестности єст ище 19 тысяч коней.

Килько єст людей на світі? В Женеві появил ся на рок 1936/37 Рочник Статыстич- ный Лигы Народов, котрый єст уважанный за одно с найповажнійших жерел на землі. В роч- нику том читате, же тепер жеє на цілой кулі земной 2 миллиарды 95 милионов людей. С того числа в самом Кытаю жеє пол мили- ярда людей.

Молят ся за „души“ ляльок и жаб. Каждого року в перших днях липня обходят в Японії торжественне свято в честь стол- ченых в році ляльок.

В том році отбыло ся таке свято в Токио с великом парадом. Молили ся за „упокой душ“ 12 тысяч ляльок. Черепкы с них ле- жали на долгом столі, уставленом в шпиталі „хворых ляльок“.

В святыні буддийской в Сана в Индиях отслужено в послідном році 100 тысяч молитв за жабы, котры убили учены, робячи на них досвіды.

Бедля науки религии Будды душа зві- ряти єст также безсмертна, як и душа чело- віка, отжеж и жаба може быти также мучен- ником науки.

Упал сніг там, где го николи не было. В горах Ворчестер в полудневой Африці, не- далеко Капштада упали величезны снігы. Сні- гов таких не виділи ище николи в Африці.

Снігы стаяли скоро, бо по сніжною задуявці бжло дораз 40 градусов Цельсия спеку.

Таинственна хворота в ріці. Доносят с Сао Пввльо (Бразылія), же в ріці Апиягы панує якаси хворота, от котрой гынут масово рыбы. Страх людей, жиючих над берегами той рікы увелнчат ся с каждым днем, бо по- явила ся там также чорна оспа. Населене утікат с zagrożенык місцевостей.

Пробудила ся по 30-ох роках. В шпи- талі в Йоганнесбургу Німеччині пробудила ся со сна една стара баба Анна Цванкель.

Спала она твердым сном через 30 літ. Всі счудовали ся сильно, коли збуджена баба зажадала істи, сїла смачно обід и домагала ся забавок. Оказало ся, же баба здітинніла цілковито.

Вісти с краю.

Замовил собі похорон и помер. Недавно помер в Родаках 76-літний селянин. Старец пречувал смерть, бо того дня, коли помер, у- дал ся до священника, полагодил формаль- ности и заплатил за похорон 250 злотых. По повороті до хаты хотіл он ище ити до міста, штобы закупити трумну, але сили его опусти- ли и он помер спокійно и без болей.

Цікавий случай с топельцом. До маєтку Крживины, в пов. косцяном, где перед па- ру днями утопил ся в часі купаня в озері сын властителя того маєтку; спроваджено с Гды- ні нурка, бо не могли нигде найти утопленого. Коли нурок приготавил ся уж до зануреня ся в воду, нагло тіло топельца появило ся на по- верхні воды. Дивне тото совпаденє обсто- ятельств выкликало на присутных глибоке вра- жене.

Неудалый выїзд до Испании. Чотырох молдцов жиючих стало в Закопаном постано- вило вступити до войск повстанчих ген. Фран- ко в Испании. В той ціли выїхали они до Кра- кова, оттамаль на Горишний Шлеск, где пе- решли через границу безправно. Але ту зло- вили их німецькы власти и отставили до Хо- ржова, где заняла ся нима полиция.

20-літ сідил невинно в криминалі. Окружный Суд в Вейгерові на Поморі розсу- дил тепер справу, котра влече ся уж 20 літ. Перед тым часом засудил суд одного хлопа, Вл. Павловского с села Вышицико на досмерт-

ну в'язницю за убийство німца Шамма. Всьо промовляло за тым, же убил Шамма Пав- ловский, бо коли вышол от него с хаты, найдено Шамма с простріленом головою. Прото тыж суд видал такый острый вырок.

Не помогла нич стараня адвоката. Пав- ловского поміщено в в'язниці, в котрой про- сідил 20 літ. Але адвокат не давал за выгра- ну и доказал судови, же убийство пополнило... сонце, котре росогріло люфу штуцера и шту- цер сам выстрілил.

При баданях выказал адвокат, же пови- шеный таксамо штуцер выстрілил сам, коли на него світило сонце и куля прострілила в саму середину чела вытесаного с дерева хлопа, поставленого там, где сідил Шамм.

Суд по том доказі освободил Павловско- го. Але Павловский, котрый сідил в крими- налі от 1917 року, єст уж тепер сивым, на половину темным старцом.

С каменем на шиі скочил до рікы. Єден хлоп с села Лучкы в воев. тарнополь- ском Иван Стахов пополнил в несамовитый способ самоубийство, шмаряючи ся до рікы с увязаным до шиі каменем. Крім того на- клал собі каменей до всіх кышенок одежи. Тіло выловлено по долшом часі.

Сука заступила котяткам маму.

Знана єст ненависть kota и пса. Рірко тра- флят ся, жебы тоты звірята жили с собом в згоді. Тым дивнійшим выдає ся случай, який мал місце в Радомю.

Недавно окотила ся там котка и мала че- тверо котят. В пару дней погодивше упала она до студні и утопила ся. Котяткам грозила го- лодова смерть.

Раз, коли котята мьвчали от голода, при- шла до котят сучка и почала их кормити. Ко- тята почали сосати сухы початково цицкы, в котрых незадолго появило ся молоко. От того часу сучка кормит котята, котры ховают ся здорово.

В неділю, дня 1. серпня 1937 о годині 2-гой по полудни отбуде ся в Ростоці Вели- кой пов. новосандецкого в дома г-на Павла Репелы

ОБЩЕ СОБРАНИЕ

членов читальні им. Михаила Качковского на котре заряд запрашат доокрестне селян- ство и интеллигенцию.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО.

НЕХАЙ ЯКНАЙСКОРШЕ

зааскурує ся
в асекураційном Товаристві
ВИТА И КРАКОВСКЕ
во ЛЬВОВІ

Асекурацію принимают на цілой Лемковщині
представителі: гг. Осиф Ямовицкий — Крыница - Село
и Михаил Перелом — Сянок.